

Mawdi 4 désanm lanné 2018, zèlèv òpsyon L.V.R kréyòl : **kolèj Boukan, kolèj Bébèl é ta zèlèv lisé Sonny Rupaire** sanblé adan on ripaj maké pou voyé lang kréyòl monté. Dékatman-lasa fèt anba lòpsyon a lanméri Sentwòz ki té vlé zanfan lékòl Sentwòz lyanné alantou a lang kréyòl.

Yo woulé asi tèks a on vayan maké Gwadeloup : **Sonny Rupaire**. Lè yo fin maké sé zèlèv-la sanblé alantou a on didiko lanméri Sentwòz mété si pyé pou yo.

**Woulo pou jouné-lasa, woulo pou zèlèv an-nou,
woulo pou lang kréyòl !**

TANBOU

Pou Jéra Lokèl

Ou vwè noutout fèt é grandi.
Nou fè 'w viv èvè lokans a dwèt an nou,
An kadans a doulè an nou...
Nou fè 'w ri a pèdsouf
Lè sa té ka rivé nou ri.
É byendéfwa, douvanjou,
Lè lérépondè té kagou
nou pran sonmèy an kontribann,
tèt an nou apiyé si zépòl a 'w.

Tanbou,
ou sé on pyès-fanm,
doubout dwèt kon bitasyon san bityé;
mouchwè anpizé, maré san on pli
lantou tèt a 'w,
ren sanglé pou 'w pé sa woulé,
pou 'w wouklé, pou 'w boula ;
Ha ! Tanboudibrèz !
ou sé on fanm-bitasyon :
ou pa ni kolyé ;
ou pa ni zanno,
mé lè ou bay lavwa,
sé onsèl voumtak, onsèl voukoum,
moun ka santi yo adan on nich a taktak.



[...]

Sonny RUPAIRE, Gran parad ti kou baton, 1970